

# BATAKURU PUULUSA HAA E BE FILIPII BEN

**1** <sup>1</sup> Immorde e an min Puulusa e Timotee, menen dii kurkaadi Iisaa Almasiihu on, haa e yimbe Alla humondirbe e Iisaa Almasiihu on fow ka saare Filipii, e ardotoobe \*moftal ngal e wallitotoobe ngal ben.

<sup>2</sup> Yo moyere e buttu wonan on immorde e Alla Baaba men, e Iisaa Almasiihu Joomi on.

## Fii no Puulusa Du'orani ɓe Filipii ben

<sup>3</sup> Mido jarnude Alla an on saa'i kala nde mi anditi fii mon. <sup>4</sup> Saa'i kala nde mi torantoo on on fow, ko e nder weltaare mi tororta, <sup>5</sup> sabu ko kafidudon e amen fii Kibaaru Moyyo Iisaa Almasiihu on kon, gila nande mi hewti ka mon haa hande.

<sup>6</sup> Mido felliti, Alla, on Fuddiido kuugal moyyal e mon, jokkay timmingol dun haa nande ardu Iisaa Almasiihu on.

<sup>7</sup> No haani ka mi miijorana on nii, ko fii mido wadi on ka bernde an. Ko fii on fow ko on kafidube e an sulfu Alla on, woni e nder ko mi sokaa kon, woni ko mi darantoo Kibaaru Moyyo on kon, mi haqinqina mo. <sup>8</sup> Ko fii Alla no seeditanoo mi wonde mido yidi on on fow wano Iisaa Almasiihu on yidiri on non.

<sup>9</sup> Ko mi torantoo on, ko yo giggol mon ngol burtu beydaade, e nder gandal e faamangol ko woni woo. <sup>10</sup> Dun, on waaway taskaade, anda koburi moyyude kon, fii no laatoron be bernde laabunde e be felnaaki nande ardu \*Almasiihu on, <sup>11</sup> heewube kuude feewude iwrude e Iisaa Almasiihu on fii mangu e mantoore Alla.

## Fii no Sokeede Puulusa nden Bantiri fii Kibaaru Moyyo on

<sup>12</sup> Mi faalaa yo on andu, yo musibbe an, ko hebunoo mi kon wallii fii no Kibaaru Moyyo on bantora. <sup>13</sup> Kodun wadi, gila e bee suufaabbe lando on, haa nabani hen fow, bangji wonde ko fii Almasiihu on mi sokiraa. <sup>14</sup> E nder ko mi sokaa kon, burbe

ben e musibbe ben burtii hoolaade Joomiraado on, be beydi suusude fii fejningol daaluyee Alla on e baawo kulol.

<sup>15</sup> Ko goonga, wobbe ben no waajorde fii Almasiihu on nawliigu e monee, kono wobbe ben ko e hoore anniye moyyo woni wadirde dun. <sup>16</sup> Ben non no wadirde dun giggol, e hoore andugol wonde mi wadaama haqinqinoowo Kibaaru Moyyo on. <sup>17</sup> E hin-le, ben wonbe banginirde fii Almasiihu on haasidi, anniyeiji maabbe din hinaa laabudi, hibe mijji beyditude satteende e hoore ko mi sokaa kon.

<sup>18</sup> No wa'i woo ko seeda hitti. Woni ko e anniyeiji moyyi maa si ko e anniyeiji bondi, min mi weltike, mi weltoto kadi, bay fii Almasiihu on waajaama. <sup>19</sup> Ko fii mido andi, dun wontanay lan kisiyee sabu torndeeji mon Alla din e ballal Ruuhu Iisaa Almasiihu on. <sup>20</sup> Faale an tiidudo on e tama'u an on ko ko tawi kon mi hersirtaa hay huunde, kono gila doo haa poomaa, mi geray no Iisaa Almasiihu on mawniniree e an min e nder hoolaare tiidunde, woni non ko e nder ngurndan an dan, woni ko e nder mayde an nden. <sup>21</sup> Ko fii min, ko Almasiihu on woni ngurndan an dan, mayde nden ko tono e an. <sup>22</sup> Kono si mido wuuri e oo aduna, dun mi waaway gollude golle nafooje. Ko hondun mi haani subaade? Mi andaa! <sup>23</sup> Ko fii mido poodeede e cende den didii non. Mido mari faale yahugol tawtoya Almasiihu on, ko dun buri moyyude. <sup>24</sup> Kono ko si mido wuuri buri wondande on e nafa. <sup>25</sup> Ko fii mido andi, mido felliti mi lutay, mi wona moggo mon on fow, fii bantal mon ngal, e fii weltaare mon nden ka nder gomdinal. <sup>26</sup> Dun, haray mantoore mon nden e fee Iisaa Almasiihu on beydoto sabu an nde mi yiltitoyii ka mon. <sup>27</sup> Ko woni tun, woniree e noone no haanirani Kibaaru Moyyo Almasiihu on. Woni mi aru yi'ugol on, woni mi araali, yo mi nanu tun no wowlee fii mon wonde hidon tabiti e mijjo wooto, tippiranon gomdinal Kibaaru Moyyo on e nder anniye gooto, <sup>28</sup> hara on jabaali hulbinireede huunde immorde e aybe ben. Dun wonanay be maande halkagol maabbe ngol, kono onon dun wonana on maande kisiyee mon on, dun ko immorde e Alla. <sup>29</sup> Ko onon yedaa moyyere sabu Almasiihu

on, hinaa non gomdingol mo tun, kono ko tampangol mo kadi.<sup>30</sup> Jooni on wakkilike tippiro ngo mi woni e mun ngon, ngon tippiro ngo yi'unodon mido tippiree, e ngon ngo wondon nanude mido tippiree haa jooni.

**Fii Nembingol Iisaa e nder Yankinaare makko nden**

**2** <sup>1</sup>Nde tawnoo on hebii wakkilineede sabu Iisaa Almasiihu on, e dankeede e nder giggol, e mbeldigal, e yurmeende, e jokkere endan e nder Ruuhu Allaahu on,

<sup>2</sup>timminiree weltaare an nden hebugol mijo wooto, e nder giggol gootol e fondo wooto e anniye gooto. <sup>3</sup>Wota on warru huunde haasidi maa mant mehi, kono e nder yankinaare jogoron heddiibe ben waburbe on. <sup>4</sup>Doo e yo mo kala e mon wattan yiila e fii ko nafata dun kon, wattanee yiila e ko nafata beya kon kadi.

<sup>5</sup>Wadon e mon mijo wonnoongo e Iisaa Almasiihu on ngon:

<sup>6</sup>Dun ko on mo mbaadi mun woni ndi Alla,

kono o habbitaaki fotugol e Alla,

<sup>7</sup>kono o tippini hoore makko,

oyetti mbaadi maccudo

e hoore nandintinagol e neddanke.

Bawto tawdegol e noone neddanke,

<sup>8</sup>o jippini hoore makko,

odoftii haa e mayde,

hay maayugol e \*leggal altindiraangal.

<sup>9</sup>Ko dun wadi si Alla towni mo

ka buri toowude ton,

o yedi mo innde burnde mawnude inde den fow,

<sup>10</sup>fii kala ko tagaa

ko woni ka kammuuli e ka hoore leydi e ka nder leydi

yo jicco e innde Iisaa,

<sup>11</sup> e yo kala denngal qirrito  
wonde Iisaa Almasiihu on ko Joomiraado  
ka mangu Alla Baabaajo on.

### Fii Wa'ugol wa Koode

<sup>12</sup> Jooni non, yo yiibbe an, nde tawnoo hidon duumi e doftaare, golliree kisiyee mon on e nder kulol e teddungal, hara hinaa e yeeso an tun, kono yo furtu e baawo an. <sup>13</sup> Ko fii ko Alla woni wadude e mon faale on e huuwingol on ko yaadi e ebboore makko moyyere nden.

<sup>14</sup> Wadiree fow e baawo dukugol e yeddondiro, <sup>15</sup> fii no laatoron laabube 6e felnaaki, e no woniron faybe Alla 6e felnaaki e hakkunde nguu jamaanu bonngu boyliingu, ngu jalbirdon e hakkunde mun wa koode e oo aduna, <sup>16</sup> jogiibe daaluyee ngurndan dan. Dun, on wonanoyay lan 6e mi mantorta jnande ardu \*Almasiihu on, dun haray wonanii lan seedee ko mi jindi kon e ko mi tampi kon wonaali meere.

<sup>17</sup> Hay si tawii mi wonay sadaka hibbanteedo Joomiraado on fii timmingol sadaka mon on e kurkagol mon ngol immorde e gomdfinal mon ngal, haray mido weltii, mido weltodi kadi e mon on fow. <sup>18</sup> Onon kadi weltoree wano non, weltodon e an!

### Fii Timotee e Epafruuditu

<sup>19</sup> Mido tanyinori Iisaa Joomi on nelugol Timotee haa e mon ko neebaa, fii no mi wakkilora min tigi sabu din kibaaruji di mi hebirta on. <sup>20</sup> Ko fii hay gooto aaniranaa on wa an si hinaa kanko Timotee. <sup>21</sup> Ko fii fow ko nafa mun on woni dabbude, hinaa nafa wondo e Iisaa Almasiihu on. <sup>22</sup> Kono hidon andi ko honno Timotee banginiri fii mun, e no men gollidiri fii Kibaaru Moyyo on, wa paykun wonkun moggo ben mun. <sup>23</sup> Awa, mido tanyinii nelugol mo haa e mon, nde mi

humpitii ko laabi fii ko heboytammi kon woo.<sup>24</sup> Awa kadi mido hoolori Joomiraado on, wonde min tigi mi yahay ko neebaa.

<sup>25</sup> Mido tanyinii no moyyî ka mi nelta e mon oo musiddo an, wondiddo an e golle e tippiro, wi'eteedo Epafruuditu, mo nelunodon e an, jonnordon piiji di mi handi.

<sup>26</sup> Himo wuldaa on fota, on fow, awa kadi himo aani fota fii ko humpitidon fii nawnaare makko nden kon.<sup>27</sup> Ko goonga, o nawnuno haa moggo mayde, kono Alla yurmaa mo, hinaa kanko tun non o yurmaa, kono min men, fii wota mi hebu sokola e hoore sokola.<sup>28</sup> Awa mi neltanii on mo e hoore hawjere tiidunde fii yo on weltor yi'ugol mo, e no min kadi sokola an on duytora.<sup>29</sup> Jabbee mo e innde Joomiraado on, wondude e weltaare timmunde, teddinon kadi sifa ben yimbe.<sup>30</sup> Ko fii, ko sabu golle Almasiihu on o eppirnoo mayde, fewndo o weebitunoo ngurndan makko dan, fii gollangol lan golle de onon tigi on waawaano.

### Fii Peewal Haqiqawal ngal

**3** <sup>1</sup> Ka rawnoode, yo musibbe an, weltoree Joomiraado on. Ko fii tampintaa lan ka mi fillitoo windangol on, ko fii dun ko ko dandata on. <sup>2</sup> Awa reenee e dawaadî din, reenodon e golloobe bonbe ben, reenodon e barajeliibe ben.<sup>3</sup> Ko fii, sunninaabe tigi-tigiibe ben ko enen, enen bee rewiroobe Alla Ruuhu makko on, enen bee mantorbe Iisaa Almasiihu on, enen bee be hooloraa bandu mun. <sup>4</sup> E hin-le min kadi, mido waawunoo fawude hoolaare an nden e bandu an ndun.

Si tawii goddo no sikka no waawi fawude hoolaare mun nden e bandu mun, min kadi mido waawi koburi dun.<sup>5</sup> Ko fii mi sunninano ka nalaande jeetatabere. Ko mi jibinannde \*Isra'iila ka bolondaa \*Buniyamiinu, yiy'an \*Aabirayanke tigi. Fii telen-ma ka teddingol Sariya Muusaa on, mido tawdanoo e \*Fariisiyaabe

---

<sup>a</sup>3.2 Ben «barajeliibe» ko jannoobe wondema ko sunninegol kisiyee heborta.

6en.<sup>6</sup> Hakkee ko mi himmunoo, mi cukkotono gomdinbe Iisaa 6en, e ley yamiroore Sariya on, tawi mi felnaaki.

<sup>7</sup> Kono ko wonannoo mi tono kon, mi jogori dun wa meere sabu \*Almasiihu on.

<sup>8</sup> Awa kadi mi jogorii fow wa meere e nder ebbindirgol dun e gandal mawngal fii Iisaa Almasiihu on, on Joomi an. Ko sabu makko mi tertori piiji din fow, mi jogori di fow wa tuude, fii no mi hebira Almasiihu on, <sup>9</sup> e no mi humondirira e makko. Hinaa sabu kuude an den maa sabu doftagol Sariya Muusaa on wadi si ko mi feewudo, kono ko sabu gomdingol Almasiihu on wadi si ko mi feewudo, dun ko ngal peewal iwrungal ka Alla, sabu gomdinal. <sup>10</sup> Faandaare an nden ko andugol mo kanko Almasiihu on, anda bawgal immintineede makko nden, mi hawtida e makko tampereeji makko din, mi wa'a wa makko ka mayde makko, <sup>11</sup> e dow tama'u immintineede e hakkunde maybe 6en.

### Fii Wakkilanagol Timmoode nden

<sup>12</sup> Hinaa fii mi hebii ko mi faandanii kon, maa mi hewtii ka timmoode, kono mido jokki yaarugol yeeso fii no mi hendoroya kon ko Iisaa Almasiihu noddirimmi fii mun. <sup>13</sup> Min tigi non, yo musibbe an, mi tanyinaaki wonde mi hendike dun taho. Kono mido wadi huunde wootere: yejjitugol fii ko fey Yi kon, poodanoo ko woni yeeso kon. <sup>14</sup> Mido dogande timmoode nden, fii no mi hebira njoddi ndi Alla noddiri en fii mun ka kammu ndin rewruude e Iisaa Almasiihu on.

<sup>15</sup> Enen mokobaabe e gomdinal 6en fow, heben sifa ngoo mijo. Si tawii non e tobbe goo hidon mari miijooji luutondirdi e dundoo, haray Alla banginanay on fii nden tobbere don. <sup>16</sup> Ko woni tun, bay en ardi haa doo, yaaden yaadu wooturu.

<sup>17</sup> Wonee nemboobe lan, yo musibbe. Yetton misal e 6en wuuiribe wano men wuuiriri non. <sup>18</sup> No woodi duudube woniribe ngayngu \*leggal altindiraangal Almasiihu on ngal. Mi wowlanii on dun soono woo. Jooni kadi, mido wowlude dun e hoore mido wulla. <sup>19</sup> Sakkitoode mabbe nden ko halkagol, ko deedi mabbe din

woni alla mabbe on, hibe wadi darja mabbe on ka hersinta 6e, awa kadi ko fii pijji oo aduna tun 6e mijotoo.<sup>20</sup> Enen, ko en jeyaabe ka aljanna ka Dandoowo mo habborden hawjere on iwata ton, dun ko Iisaa Almasiihu Joomi on,<sup>21</sup> on wayliroyoowo balli men lo'udi din bawgal makko waawayngal yankingol kala huunde e ley makko ngal, o nandintina di e bandu makko darjundu ndun.

**4** <sup>1</sup>Kodun wadi, yo musibbe an yidaabe, 6e mi wuldaa fota, onon 6e tawata ko weltaare an e \*meetelol an, tabitiree nii, niibon e Joomiraado on, yo yibbe an.

### Fii Yamirooje e Wakkilandé

<sup>2</sup> Mi torike Afuudiyata e Sinitiki, mi jeeji, yo 6e wadu sabu Joomiraado on 6e nantondira.<sup>3</sup> An men, yo mo mi gollidata, sella-findeejo, mi torike ma wallitagol bee rewbe wallube lan tippirde fii yottingol Kibaaru Moyyo on, wondude e Akilimandu e beya 6e mi gollidata fow, 6e tawata inde mun no windii ka deftere ngurndan.

<sup>4</sup> Weltee saa'i woo e nder humondiral mon e Joomiraado on, mido fillitaade kadi, weltee!<sup>5</sup> Yo yimbe 6en fow andu newaare mon nden, ko fii Joomiraado on ko Badiido.<sup>6</sup> Wota on aanu huunde, kono e kala huunde weebitiranee Alla faaleeji mondin toragol mo, landoo mo ballal, weltanoo mo.<sup>7</sup> Dun, buttu ngu Alla yedata, feyyitungu kala faamu ngun, hiway berde mon den e mijooji mon din e nder humondiral mon e Iisaa Almasiihu on.

<sup>8</sup> Ko heddii kon, yo musibbe an, kala ko tawata ko goonga, kala ko wondi e teddungal, kala ko feewi, kala ko laabi, kala ko labaa, kala ko handi e kuljeede, kala ko buri moyyude, e kala ko handi e mantoore, yo dun wonan mijooji mon ngon keyee.<sup>9</sup> Awa, ko andirdon mi kon, e ko hebirdon mi kon, e ko nanudson mido wowla kon, e ko yi'udon mido wada kon, wadee dun. Dun, Alla Jom buttu on wonday e mon.

### Fii no Puulusa Weltorani 6e Filipii ben

<sup>10</sup> Mido weltanii Joomiraado on fota, sabu ko wurnitudon nafa mon fii an kon. Hari hidon wondi e on nafa, kono hari feere nden no ȳakkiri on.<sup>11</sup> Wonaa fii mido ȳakkiraa wadi si mi wowli dun, ko fii mi ekkitike yondinorgol no mi fewndori non. <sup>12</sup> Mido waawi wuuruude e nder billaare, wano tawiri non kadi mido waawi wuuruude e nder maral. E di fow e hen fow mi ekkitike gundoo weltagol, woni e nder haarannde maa e heege, woni e nder maral maa e ȳakkireede.<sup>13</sup> Mi waawii fow sabu on Tiidindo lan. <sup>14</sup> Kono on wadii ko moyýí tawdegol mon e tampereeji an din.

<sup>15</sup> Onon 6e Filipii ben tigi hidon andi, ka fuddoode waajagol an fii Kibaaru Moyýo on ka mon, bay mi iwii Masedonii, hay \*moftal gootal wallindiraali e an ka banje jonnugol e hendagol si wonaa ngal mon ngal. <sup>16</sup> Ko fii, fewndo mi wonnoo ka saare Tesalonii, on neldanno buri nde wootere ko mi handi e mun. <sup>17</sup> Hinaa fii ko dokkal mi wonnoo dabbude, kono ko mi woni dabbude ko yo tono golle mon den beydo. <sup>18</sup> Mi hendike ko neldudon mi kon e juude Epafruuditu. Jooni mi hebii ko mi handi e mun kon haa feyýitii. Dokkal mon ngal no wa'i wa angiri ndi urngol moyýol, wa sadaka mo Alla jaabi, hara ko waalaniido mo. <sup>19</sup> Immorde e ngalu e darja Alla an on sabu Iisaa Almasiihu on, o okkay on kala ko handudon. <sup>20</sup> Yo mangural wonan Alla, Baaba men, haa poomaa. Aamiina!

### Salminaango fii Waynitagol

<sup>21</sup> Salminanee lan kala aaden Alla humondirdo e Iisaa Almasiihu on. Musibbe 6e mi wondi 6en salminii on.<sup>22</sup> Yimbe Alla 6en fow salminii on, tentinii bee jeyaabe e nduu suudu oo lando mawdo Roomu on.<sup>23</sup> Yo moyýere Iisaa Almasiihu Joomi on wonu e berde mon.

ÉPÎTRE DE PAUL AUX PHILIPPIENS - FILIPII

---

**ÉPÎTRE DE PAUL AUX PHILIPPIENS**

en Langue Pular (Fouta-Jalon)

*République de Guinée*

© 2013 Traducteurs Pionniers de la Bible

en collaboration avec

Mission Protestante Réformée